

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine FBiH", broj: 49/06, 51/09), člana 4. stav 2. Zakona o cestama Federacije Bosne i Hercegovine ("Službene novine FBiH", broj: 12/10, 16/10 i 66/13 – ispravka), član 55. i 104. Statuta Općine Ilijaš – prečišćeni tekst ("Službene novine Kantona Sarajevo", broj: 20/9, 46/18), člana 99. Poslovnika Općinskog vijeća Ilijaš ("Službene novine Kantona Sarajevo", broj: 2/10 i 18/05, 7/19), Općinsko vijeće Ilijaš na svojoj redovnoj 4. sjednici, održanoj dana, 30.03.2021. godine, d o n o s i:

## **ODLUKU O NERAZVRSTANIM CESTAMA NA PODRUČJU OPĆINE ILIJAŠ**

### **I – OPĆE ODREDBE**

#### **Član 1.**

Ovom Odlukom uređuje se upravljanje, izgradnja, rekonstrukcija, sanacija, održavanje, zaštita, korištenje, uređenje saobraćaja, finansiranje i poslovi nadzora na nerazvrstanim cestama na području Općine Ilijaš.

#### **Član 2.**

Nerazvrstana cesta je površina koja se koristi za saobraćaj po bilo kojoj osnovi i koja je pristupačna većem broju korisnika, a nije razvrstana u jednu od kategorija javnih cesta.

#### **Član 3.**

Nerazvrstanu cestu čini:

- a) cestovna građevina (donji i gornji stroj ceste),
- b) cestovni građevinski objekti (mostovi, propusti, potporni i obložni zidovi, pothodnici, nadhodnici itd),
- c) građevine za odvodnju i prečišćavanje vode,
- d) cestovni pojas širine 1 m od vanjskog ruba ceste s obje strane,
- e) zračni prostor iznad kolovoza u visini do 7,0 m,
- f) saobraćajne površine uz kolovoz (pješačke staze neposredno uz kolovoz ili odvojene od kolovoza, autobuska stajališta i okretišta),
- g) priključci na nerazvrstanu cestu u širini zaštitnog pojasa,
- h) saobraćajna signalizacija (horizontalna i vertikalna saobraćajna signalizacija, svjetlosno-signalni uređaji, oprema parkirališta, odmorišta i sl.),
- i) oprema ceste (smjerokazni stubići, kilometarski stubići, odbojnici, javna rasvjeta u funkciji saobraćaja, ograde i slično).

#### **Član 4.**

(1) Planiranje razvoja nerazvrstanih cesta vrši se u skladu sa Strategijom razvoja i održavanja javnih cesta na području Općine Ilijaš kojom se određuju ciljevi i zadaci razvoja cesta.

(2) Strategiju razvoja i održavanja javnih cesta na području Općine Ilijaš donosi Općinsko vijeće na razdoblje od 10 godina.

#### **Član 5.**

Strategija razvoja i održavanja javnih cesta na području Općine Ilijaš obuhvatat će lokalne ceste koje su definisane Odlukom o razvrstavanju vangradskih lokalnih cesta na području Kantona Sarajevo (Službene novine Kantona Sarajevo", broj: 22/13, 40/14), kao i nerazvrstane ceste od prioritetne saobraćajne važnosti za Općinu Ilijaš.

## **Član 6.**

Kriterijumi na osnovu kojih su definisane nerazvrstane ceste od prioritetne saobraćajne važnosti za Općinu Ilijaš su:

- a) gustina naseljenosti,
- b) nerazvrstane ceste koje povezuju privredne subjekte sa ostalim dijelovima Općine Ilijaš,
- c) nerazvrstane ceste koje povezuju historijsko-kulturne, turističke, zdravstvene i sportsko-rekreacione lokalitete od značaja za Općinu Ilijaš.

## **II – UPRAVLJANJE NERAZVRSTANIM CESTAMA**

### **Član 7.**

Poslove vezane za upravljanje, građenje, rekonstrukciju, sanaciju, održavanje i zaštitu lokalnih cesta na području Općine Ilijaš vrši Općinski načelnik putem Službe za saobraćaj, stambeno-komunalne poslove i građenje (u daljem tekstu: nadležne Službe).

### **Član 8.**

Općinski načelnik putem nadležne službe obavlja sljedeće poslove:

- a) poslove građenja, rekonstrukcije, sanacije, održavanja i zaštite nerazvrstanih cesta,
- b) donosi godišnji plan izgradnje, rekonstrukcije, održavanja i zaštite nerazvrstanih cesta, koji je sastavni dio godišnjeg Operativnog plana Općinskog načelnika i službi koji usvaja Općinsko vijeće Ilijaš,
- c) organizuje tehničko i finansijsko sprovođenje godišnjeg programa,
- d) organizuje poslove projektovanja, izgradnje, rekonstrukcije, sanacije i održavanja nerazvrstanih cesta,
- e) stara se o realizaciji mjera i aktivnosti na unaprjeđenju bezbjednosti saobraćaja na nerazvrstanim cestama,
- f) vodi evidenciju (bazu podataka) nerazvrstanih cesta, objekata, saobraćajne signalizacije i katastra cestovnog zemljišnog pojasa,
- g) stvara uslove za normalno korištenje i provođenje mjera zaštite nerazvrstanih cesta,
- h) privremeno zabranjuje ili ograničava odvijanje saobraćaja na nerazvrstanoj cesti ili dijelu ceste, zavisno od stanja ceste, izvođenja radova i mogućnosti obavljanja saobraćaja,
- i) podnosi izvještaj Općinskom vijeću o izvršenim planovima kroz Godišnji izvještaj o radu Općinskog načelnika i Službi.

### **Član 9.**

Definisanje nerazvrstanih cesta koje su od prioritetne saobraćajne važnosti za Općinu Ilijaš donosi Općinski načelnik na osnovu kriterijuma iz člana 6. ove Odluke, a na prijedlog nadležne Službe.

## **III – IZGRADNJA, REKONSTRUKCIJA I SANACIJA NERAZVRSTANIH CESTA**

### **Član 10.**

Izvođenje radova, građenje, rekonstrukciju, sanaciju i održavanje nerazvrstanih cesta Općinski načelnik ustupa po postupku i na način utvrđen Zakonom o javnim nabavkama ("Službeni glasnik BiH", broj: 39/14).

### **Član 11.**

Izgradnja, rekonstrukcija, sanacija i održavanje nerazvrstanih cesta vrši se u skladu sa savremenim stručnim saznanjima i procjenama opravdanosti.

### **Član 12.**

(1) Pod izgradnjom nerazvrstanih cesta, u smislu ove Odluke, smatra se izgradnja nerazvrstanih cesta pretežno po novoj trasi.

(2) Poslovi izgradnje nerazvrstane ceste u smislu ove Odluke obuhvataju: građevinsko projektovanje sa istražnim radovima, projektovanje pratećih objekata i saobraćajne signalizacije, otkup zemljišta i objekata, premještanje komunalne infrastrukture, pribavljanje odobrenja za građenje, ustupanje radova građenja, organizaciju stručnog nadzora i kontrole ugrađenih materijala i izvedenih radova, tehnički pregled i primopredaja na korištenje i upravljanje nerazvrstanih cesta i objekata.

(3) Pod rekonstrukcijom nerazvrstanih cesta, smatraju se radovi na dijelu postojeće ceste kojim se mijenjaju njene tehničko-građevinske karakteristike i konstruktivni elementi u cilju povećanja kapaciteta ceste i poboljšanja uslova saobraćajnih usluga.

(4) Izgradnja i rekonstrukcija nerazvrstanih cesta može se izvesti na osnovu tehničke dokumentacije izrađene od ovlaštenog pravnog lica u skladu sa odgovarajućim tehničkim propisima.

(5) Pod sanacijom nerazvrstanih cesta, u smislu ove Odluke, smatraju se radovi na dijelu postojeće ceste kojima se poboljšava sigurnost učesnika u saobraćaju i održavanja projektovanog stanja nerazvrstanih ceste.

(6) Sanacija nerazvrstanih cesta se može izvesti bez tehničke dokumentacije izrađene od ovlaštenog pravnog lica, projekta i građevinske dozvole.

### **Član 13.**

Nerazvrstana cesta se mora projektovati i graditi prema normativima i građevinskim planovima, tako da se njom može sigurno odvijati saobraćaj za koji je namijenjena.

### **Član 14.**

Nerazvrstana cesta mora se projektovati i graditi minimalne širine kolovoza 4,5 m za dvosmjerni i 3,0 m za jednosmjerni saobraćaj sa konstrukcijom koja podnosi minimalno osovinsko opterećenje od 5 tona ako dozvoljavaju prostorni uslovi.

### **Član 15.**

Autobuska stajališta za zaustavljanje vozila na nerazvrstanim cestama gradit će se u skladu sa Pravilnikom o minimalnim tehničkim uslovima za izgradnju i upotrebu autobuskih stajališta ("Službene novine FBiH", broj: 69/10) ako dozvoljavaju prostorni uslovi.

### **Član 16.**

(1) Ako se izgradnjom nerazvrstane ceste predviđa izgradnja komunalnih, vodoprivrednih ili drugih objekata, tehnička dokumentacija mora obuhvatiti i te objekte i radove koji će se izvesti ispod ili iznad površine ceste.

(2) Troškove izrade tehničke dokumentacije i izgradnje objekata iz stava 1. ovog člana snosi investitor komunalnih, vodoprivrednih ili drugih objekata.

### **Član 17.**

(1) U slučaju rekonstrukcije nerazvrstane ceste koja iziskuje premještanje postojećih instalacija u cestovnom pojasu, vlasnici instalacija su dužni o svom trošku izmjestiti te instalacije, odnosno prilagoditi ih nastalim promjenama.

(2) Investitor radova na rekonstrukciji ceste dužan je najmanje tri mjeseca ranije obavijestiti vlasnika instalacija o početku radova i omogućiti im uvid u tehničku dokumentaciju bez obaveze pribavljanja saglasnosti vlasnika instalacija.

(3) U slučaju da vlasnik instalacija u trupu ceste i u cestovnom pojasu ne izmjesti svoje instalacije iz stava 1. ovog člana i ne prilagodi ih nastalim promjenama do početka radova

na rekonstrukciji ceste, investitor radova na rekonstrukciji nerezvrstane ceste će izvršiti premještanja, odnosno prilagođavanja postojećih instalacija na teret vlasnika instalacija.

#### **Član 18.**

U slučaju preusmjerenja saobraćaja na nerazvrstanu cestu radi izvođenja radova na javnoj cesti, upravitelj javne ceste je dužan po okončanju radova i uspostavljanju saobraćaja na javnoj cesti, u što kraćem roku otkloniti nastala oštećenja na nerazvrstanoj cesti radi dovođenja nerazvrstane ceste i saobraćaja u prvobitno stanje.

#### **Član 19.**

Na mjestu ukrštanja nerazvrstane ceste sa željezničkom prugom moraju se preduzeti mjere osiguranja propisane Zakonom o osnovama i sigurnosti saobraćaja na cestama u Bosni i Hercegovini ("Službeni glasnik BiH", broj: 6/06) i Zakonom o sigurnosti željezničkog prometa ("Službeni list RBiH", broj: 33/95).

### **IV – ODRŽAVANJE NERAZVRSTANIH CESTA**

#### **Član 20.**

Održavanje nerazvrstane ceste, u smislu ove Odluke, obuhvata izvođenje radova kojima se osigurava nesmetan, siguran saobraćaj i očuvanje projektovanog stanja cesta.

#### **Član 21.**

Poslovi održavanja nerazvrstanih cesta su:

- a) poslovi redovnog održavanja i
- b) poslovi vanrednog održavanja.

#### **Član 22.**

(1) Nerazvrstane ceste održavaju se na osnovu godišnjeg Programa održavanja kojeg donosi Općinski načelnik.

(2) Redovno održavanje nerazvrstanih cesta čini skup mjera i aktivnosti koji se obavljaju tokom godine na nerazvrstanim cestama, u cilju njihovog održavanja, prohodnosti, tehničke ispravnosti i sigurnosti saobraćaja.

(3) Redovno održavanje nerazvrstanih cesta obuhvata ljetno i zimsko održavanje.

(4) Redovno održavanje nerazvrstanih cesta obuhvata:

- a) popravak kolovoza, trupa ceste, potpornih i obložnih zidova i objekata na cesti,
- b) saniranje udarnih rupa na kolovozu,
- c) čišćenje kolovoza, zaštita kosina nasipa usjeka i zasjeka,
- d) zamjenu i popravak saobraćajne signalizacije i ostale opreme na cesti,
- e) održavanje potrebne preglednosti ceste i znakova u cestovnom pojasu,
- f) košenje trave i održavanje zelenih površina u cestovnom pojasu,
- g) održavanje bankina,
- h) čišćenje snijega sa kolovoza, autobusnih stajališta i trotoara,
- i) posipanje kolovoza u slučaju poledice i

j) obavljanje drugih poslova kojim se osigurava stalan i siguran saobraćaj na cestama.

(5) Vanredno održavanje nerazvrstanih cesta su obimniji radovi i mogu se izvoditi samo na osnovu tehničke dokumentacije, bez pribavljanja saglasnosti i druge dokumentacije prema Zakonu o prostornom uređenju Kantona Sarajevo ("Službene novine Kantona Sarajevo", broj: 24/17 i 1/18).

(6) Vanredno održavanje nerazvrstanih cesta obuhvata:

- a) obnavljanje, ojačavanje ili zamjenu kolovoznog zastora,
- b) obnavljanje potpornih zidova,

- c) ojačavanje i zamjenu propusta,
- d) ojačavanje mostova i zaštitu čelične konstrukcije,
- e) izradu pješačkih staza i ugrađivanje ivičnjaka,
- f) obavljanje i drugih obimnijih poslova koji ne spadaju u redovno održavanje.

#### **Član 23.**

- (1) Izvođenje radova redovnog i vanrednog održavanja nerazvrstanih cesta povjeravaju se po postupku i na način utvrđen Zakonom o javnim nabavkama BiH ("Službeni glasnik BiH", broj: 39/14).
- (2) Izabrano pravno lice, održavanje nerazvrstanih cesta provodi u skladu sa ugovorom kojim se regulišu uslovi i način izvršavanja radova održavanja i zaštite cesta.
- (3) Općinski načelnik putem nadležne Službe usmjerava i prati realizaciju zaštite i održavanja nerazvrstanih cesta.
- (4) Ugovorom o održavanju nerazvrstanih cesta preciziraju se vrste radova koji su predmet ugovaranja, vrijeme na koje se ugovor zaključuje, ugovorena vrijednost radova, predmjer i predračun radova, uslovi i način izvođenja radova, tehnički i stručni nadzor prilikom izvođenja radova, način obračuna, rokovi plaćanja, odgovornost za štete i druge odgovornosti i način rješavanja sporova.
- (5) Ugovaranje održavanja nerazvrstanih cesta mora se vršiti u kontinuitetu.
- (6) Pravno lice kojem su povjereni poslovi održavanja nerazvrstanih cesta odgovorno je za njihovo pravovremeno i stručno izvršenje.
- (7) Održavanje revizijskog okna komunalnih instalacija i uređaja ugrađenih u cestovnom pojasu nerazvrstanih cesta dužan je provoditi vlasnik tih instalacija i uređaja.

#### **Član 24.**

- (1) Radove na održavanju nerazvrstanih cesta treba izvoditi tako da se zbog njih ne obustavlja saobraćaj.
- (2) U slučaju potrebe obustavljanja saobraćaja zbog izvođenja radova, nadležna Služba će po zahtjevu izvođača radova, najkasnije u roku od 48 sati prije početka obustave saobraćaja, ocijeniti opravdanost zahtjeva i izdati odobrenje o privremenom zatvaranju ili izmjeni režima saobraćaja na nerazvrstanim cestama, te putem web stranice Općine Ilijaš i Radio Ilijaša obavijestiti učesnike u saobraćaju o obustavi saobraćaja i preusmjeravanju saobraćaja za vrijeme obustave.
- (3) Za svaki zahvat na nerazvrstanoj cesti, pri izvođenju radova održavanja ili drugih radova mora se postaviti odgovarajuća privremena saobraćajna signalizacija i oprema, odnosno provesti tehnička regulacija saobraćaja na način da se garantuje sigurnost saobraćaja.
- (4) Ukoliko se radovi na održavanju nerazvrstane ceste koji iziskuju izmještanje saobraćaja izvode na dijelu nerazvrstane ceste gdje ne postoji mogućnost izmještanja saobraćaja, u odobrenju se može naložiti da se radovi izvode noću.
- (5) U izdatom odobrenju izvođaču se nalaže da nakon završetka radova ukloni dopunsku saobraćajnu signalizaciju i nerazvrstanu cestu dovede u stanje za neometano odvijanje saobraćaja.
- (6) Odobrenje za zatvaranje ili izmjenu režima saobraćaja izdaje Općinski načelnik putem nadležne Službe.

### **V – ZAŠTITA I KORIŠTENJE NERAZVRSTANIH CESTA**

#### **Član 25.**

- Pod zaštitom nerazvrstanih cesta u smislu ove Odluke podrazumijeva se:
- a) zaštita nerazvrstanih cesta od prekomjernog oštećenja,

- b) zaštita od nekontrolisanog izlaska većeg broja ljudi, djece i stoke na cestu,
- c) sprečavanje vršenja bespravnih radova u cestovnom pojasu,
- d) uklanjanje pokvarenih, napuštenih i oštećenih vozila s ceste ili cestovnog pojasa,
- e) regulisanje odnosa sa susjedima uz cestu,
- f) postavljanje saobraćajne i turističke signalizacije,
- g) regulisanje ograničenja i zabrana saobraćaja,
- h) regulisanje gradnje prilaza nerazvrstanoj cesti,
- i) regulisanje postavljanja kablova, vodova i instalacija u trupu ceste i cestovnom pojasu,
- j) regulisanje odvodnje, prokopavanja putnih i odvodnih kanala,
- k) osiguranje preglednosti na raskrsnicama i krivinama,
- l) sprečavanje vršenja radnji na cesti i u cestovnom pojasu, kojim bi se mogla oštetiti nerazvrstana cesta, ugrožavati saobraćaj ili povećati troškovi održavanja,
- lj) sprečavanje deponovanja materijala na ili uz nerazvrstanu cestu,
- m) regulisanje postavljanja reklama,
- n) evidentiranje cesta, saobraćajne signalizacije i opreme,
- nj) obaveza ugovaranja održavanja i zaštite nerazvrstanih cesta,
- o) vršenje drugih radnji koje su u funkciji zaštite nerazvrstanih cesta.

#### **Član 26.**

(1) Prekomjerno opterećenje nerazvrstanih cesta podrazumijeva njihovu upotrebu iznad vrijednosti saobraćajnog opterećenja za koju je projektovana odnosno građena, nastalu zbog obavljanja djelatnosti pravnih i fizičkih lica uz nerazvrstanu cestu.

(2) Pod djelatnostima iz stava 1. ovog člana, kod kojih može doći do prekomjernog opterećenja nerazvrstane ceste smatra se: izgradnja infrastrukturnih i drugih objekata, proizvodnja odnosno eksploatacija energetskih mineralnih sirovina ili drugih prirodnih materijala, preusmjeravanje saobraćaja zbog zatvaranja javne ceste ne duže od 10 dana na nerazvrstanu cestu.

(3) Ako je nerazvrstana cesta izložena povećanom saobraćajnom opterećenju iz stava 1. ovog člana pravna ili fizička lica u vezi s čijim djelatnostima dolazi do njenog prekomjernog opterećenja dužni su podnijeti zahtjev za izdavanje rješenja o odobrenju za prekomjernu upotrebu nerazvrstane ceste, te platiti naknadu za njeno prekomjerno opterećenje.

(4) Zahtjev za izdavanje rješenja o odobrenju za prekomjerno opterećenje mora sadržavati:

- a) opis djelatnosti korisnika,
- b) podatke o planiranoj količini tereta koje treba prevesti po nerazvrstanoj cesti,
- c) kartu cestovne mreže s ucrtanim itinererima prevoza tereta,
- d) rješenje nadležnog organa o odobrenju obavljanja djelatnosti korisnika.

(5) Rješenje o odobrenju za prekomjerno opterećenje nerazvrstane ceste donosi Općinski načelnik putem nadležne Službe.

#### **Član 27.**

(1) Ako se pored nerazvrstane ceste nalazi prostor gdje se okuplja veći broj ljudi (sportska, dječija igrališta i slično) ili zemljište na kojem se zadržavaju životinje (pašnjaci, ekonomska dvorišta i slično), vlasnik odnosno korisnik tog zemljišta dužan je taj prostor i zemljište ograditi na dijelu koji se proteže uz nerazvrstanu cestu.

(2) Ograda iz stava 1. ovog člana postavlja se i održava tako da spriječi mogućnost direktnog dolaska ljudi i životinja s tih prostora i zemljišta na nerazvrstanu cestu.

#### **Član 28.**

(1) U blizini ukrštanja u istom nivou nerazvrstanih cesta sa željezničkom prugom, na unutrašnjim stranama cestovnog zavoja i na krivinama, ne smije se saditi drveće, grmlje ili

visoke poljske kulture, ne smiju se postavljati naprave, ograde i drugi predmeti koji onemogućavaju preglednost na cesti (ugao preglednosti).

(2) Vlasnici odnosno korisnici zemljišta dužni su ukloniti drveće, grmlje i visoke poljske kulture, naprave, ograde i druge predmete koji ometaju ugao preglednosti na

nerazvrstanim cestama.

(3) Ako vlasnik odnosno korisnik zemljišta iz stava 2. ovog člana ne ukloni rastinje, naprave, ograde ili predmete iz ugla preglednosti, učinit će to pravno lice kome je povjereno održavanje nerazvrstane ceste po rješenju općinskog inspektora.

### **Član 29.**

Radi zaštite nerazvrstanih cesta i osiguranja sigurnog i nesmetanog saobraćaja na njima zabranjeno je:

a) ostavljati pokvarena, oštećena i neispravna vozila, deponiranje materijala na ili uz nerazvrstanu cestu,

b) iscrtavati ili brisati horizontalnu saobraćajnu signalizaciju, vršiti oštećenja, premještati, zaklanjati ili otuđivati vertikalnu saobraćajnu signalizaciju i cestovnu opremu,

c) dovoditi vodu na cestu i odvodna tijela ceste, ometati oticanje vode sa ceste i odvodna tijela ceste,

d) iznositi blato na cestu ili na drugi način prljati cestu,

e) po cesti vući balvane i druge predmete čime bi se cesta mogla oštetiti,

f) prosipati po cesti maziva ili druge masne materijale,

g) ostavljati, bacati materijal ili predmete na cestu i u odvodna tijela ceste ili ga deponirati uz cestu,

h) puštati životinje na ispašu u cestovnom pojasu,

i) postavljati reklamne znakove uz cestu bez saglasnosti nadležne Službe,

j) oštećivati zaštitne ili druge ograde pored ceste,

k) prevoziti teret u rastresitom stanju ako nisu poduzete mjere da se teret ne rasipa po cesti,

l) paliti travu, korov, građu i drugi materijal u zaštitnom pojasu nerazvrstane ceste,

lj) vršiti bilo kakve radove na kosinama nasipa, zasjeka i usjeka,

m) vršiti uzurpaciju cestovnog zemljišta, privođenja istog drugoj namjeni (poljoprivrednoj površini, okućnici i slično).

### **Član 30.**

(1) Uklanjanje oštećenih i napuštenih vozila i drugih stvari s nerazvrstane ceste na sigurno mjesto, koja nisu uklonili vlasnici, odnosno korisnici vozila dužna je osigurati Općina.

(2) Troškove uklanjanja i čuvanja vozila i stvari iz stava 1. ovog člana snosi vlasnik, odnosno korisnik vozila i stvari po rješenju općinskog inspektora.

### **Član 31.**

Vlasnici odnosno korisnici zemljišta koji graniče s nerazvrstanom cestom dužni su:

a) dopustiti jednostavan odvod vode i odlaganje snijega na njihovo zemljište ako im se time ne nanosi šteta,

b) u skladu sa ovom Odlukom i uz odštetu dozvoliti pristup cestovnim objektima radi njihovog održavanja, gradnje odvodnih jaraka i drugih uređaja za odvod vode od cestovnog pojasa do recipijenta, postavljanje privremenih ili stalnih uređaja za zaštitu ceste i saobraćaja na njoj od leda, snijega, buke, štetnih svjetlosnih uticaja i slično ako ih nije moguće postaviti na zemljište koje je sastavni dio ceste,

c) održavati živice,

d) ukloniti drveće ili dijelove krošnje drveća koje otežavaju saobraćaj ili onemogućavaju

zračenje i sušenje ceste,

f) graditi betonske cijevi odgovarajućeg profila na pristupnim prijelazima preko jarka u nivou s cestom.

#### **Član 32.**

(1) Saobraćajni znakovi, signalizacija i oprema postavljaju se na osnovu Projekta saobraćajne signalizacije ili Rješenja nadležne Službe.

(2) Postavljanje saobraćajne i turističke signalizacije na nerazvrstanoj cesti ustupa se ovlaštenom pravnom licu po postupku i na način utvrđen Zakonom o javnim nabavkama BiH ("Službeni glasnik BiH", broj: 39/14).

#### **Član 33.**

Izabrano pravno lice, postavljanje saobraćajne i turističke signalizacije provodi u skladu sa ugovorom kojim se regulišu uslovi i način izvršavanja radova.

#### **Član 34.**

(1) Općinski načelnik putem nadležne Službe u opravdanim slučajevima može zabraniti saobraćaj motornih vozila na nerazvrstanoj cesti.

(2) Zabrana saobraćaja za sve vrste vozila na nerazvrstanoj cesti može biti samo privremena, a zabrana za pojedine vrste vozila ili vozila iznad određene granice opterećenja može biti i stalna.

(3) Ukoliko se utvrđuje zabrana saobraćaja na cijeloj nerazvrstanoj cesti ili samo na pojedinim njenim dijelovima, moraju se odrediti alternativni pravci za odvijanje saobraćaja.

#### **Član 35.**

(1) Pod priključkom na nerazvrstane ceste prema ovoj Odluci, smatra se uređena površina sa koje se vozila i drugi učesnici u saobraćaju, neposredno uključuju na nerazvrstanu cestu.

(2) Odobrenje za priključak na nerazvrstanu cestu od prioritetne saobraćajne važnosti daje Općinski načelnik putem nadležne Službe na zahtjev Službe za prostorno uređenje i zaštitu okoliša.

#### **Član 36.**

Pravna i fizička lica u cilju obavljanja svoje djelatnosti mogu graditi elektronske, telefonske i komunalne objekte i instalacije i postavljati reklame u cestovnom pojasu nerazvrstane ceste po dobijenoj saglasnosti Općinskog načelnika.

#### **Član 37.**

(1) Evidenciju nerazvrstanih cesta, cestovnog pojasa, saobraćajne signalizacije i opreme vodi Općinski načelnik putem nadležne Službe.

(2) Evidencija o saobraćajnoj signalizaciji i opremi sadrži podatke o vrstama saobraćajne signalizacije i opreme, o mjestu i vremenu postavljanja, zamjeni i o mjestu i vremenu uklanjanja saobraćajne signalizacije i opreme.

#### **Član 38.**

Nerazvrstane ceste koriste se na način koji omogućava uredno odvijanje saobraćaja i na način da se ne ugrožava sigurnost učesnika u saobraćaju.

#### **Član 39.**

(1) Zabranjeno je izvoditi radove na nerazvrstanoj cesti i cestovnom pojasu ako bi se njima vršilo oštećenje ceste, povećavali troškovi njenog održavanja, ometao ili ugrožavao saobraćaj, a naročito je zabranjeno:



- a) neovlašteno vršenje prokopa,
  - b) graditi građevine u cestovnom pojasu koje ne služe saobraćaju, bunare, rezervoare i septičke jame,
  - c) postavljati ili pomjerati ograde ili njihove dijelove i na taj način zauzimati odnosno sužavati cestu,
  - d) graditi rampe, kapije, vrata, ograde čiji se pokretni dijelovi otvaraju u cestovni pojas,
  - e) graditi ograde i saditi rastinje pored ceste koje ometa preglednost ceste,
  - f) iscrtavati ili brisati horizontalnu saobraćajnu signalizaciju, vršiti oštećenja, premještati ili otuđivati vertikalnu saobraćajnu signalizaciju i cestovnu opremu,
  - g) vršiti bilo kakve radove na kosinama nasipa, zasjeke i usjeka,
  - h) sjeći šumu u zaštitnom pojasu kojom se narušava stabilnost kosina.
- (2) Širina zaštitnog pojasa u kome se ne mogu graditi stambene i poslovne zgrade, bunari, rezervoari i septičke jame pored nerazvrstane ceste iznose 5 m od spoljne ivice putnog pojasa.

#### **Član 40.**

U postupku izdavanja odobrenja za građenje ili urbanističke saglasnosti za građenje objekata i instalacija unutar cestovnog pojasa nerazvrstanih cesta Služba za prostorno uređenje i zaštitu okoliša je obavezna pribaviti saglasnost odnosno odobrenje od nadležne Službe.

#### **Član 41.**

- (1) Općinski načelnik putem nadležne Službe, pokreće upravni postupak po službenoj dužnosti ili po zahtjevu stranke i donosi rješenjem:
- a) odobrenje za priključak, odnosno prilaz na nerazvrstanu cestu od prioritnog saobraćajnog značaja,
  - b) odobrenje za izgradnju objekata i instalacija unutar cestovnog i zaštitnog pojasa nerazvrstane ceste od prioritnog saobraćajnog značaja,
  - c) odobrenje za postavljanje reklama u cestovnom pojasu nerazvrstanih cesta,
  - d) odobrenje za prekomjernu upotrebu nerazvrstanih cesta,
  - e) odobrenje za korištenje cestovnog zemljišta nerazvrstanih cesta od prioritnog saobraćajnog značaja i
  - f) odobrenje za privremenu izmjenu režima saobraćaja na nerazvrstanim cestama.
- (2) Protiv upravnih akata iz prethodnog stava može se podnijeti žalba Drugostepenoj stručnoj komisiji Općinskog vijeća Ilijaš.

#### **Član 42.**

- (1) Zaštitni pojas nerazvrstane ceste je pojas na kome važi poseban režim gradnje i uspostavlja se sa ciljem zaštite nerazvrstane ceste i sigurnosti saobraćaja na istoj od štetnih uticaja i različitih aktivnosti u prostoru pored nerazvrstane ceste.
- (2) U postupku izdavanja odobrenja za građenje objekata ili instalacija unutar cestovnog ili zaštitnog pojasa nerazvrstane ceste Služba za prostorno uređenje je obavezna pribaviti prethodnu suglasnost odnosno odobrenje nadležne Službe.
- (3) Zaštitni pojas nerazvrstane ceste u smislu stava (1) ovog člana unutar kojeg se ne mogu graditi, bez odobrenja nadležne službe, stambene i poslovne zgrade, bunari, rezervoari i septičke jame iznosi 5,0 m od vanjske ivice cestovnog pojasa.
- (4) U zaštitnom pojasu nerazvrstane ceste može se odobriti gradnja objekata iz stava (3) ovog člana ako isti ne ugrožavaju sigurnost saobraćaja.

#### **Član 43.**

- (1) Pravna i fizička lica za korištenje cestovnog zemljišta nerazvrstanih cesta, u slučajevima propisanih članom 40. ove Odluke, obavezna su plaćati naknadu.
- (2) Od obaveze plaćanja naknade za korištenje cestovnog zemljišta nerazvrstanih cesta

od saobraćajnog značaja, po osnovu polaganja komunalnih instalacija (cjevovodi), iz stava 1. ovog člana, oslobađaju se investitori vodovoda i kanalizacije, toplovoda, gasovoda i elektrovoda.

(3) Visina i način plaćanja naknade za korištenje cestovnog zemljišta lokalnih cesta utvrđena je Uredbom o visini naknade za korištenje zemljišta uz javne ceste ("Službene novine Federacije BiH", broj: 7/11) i Pravilnikom o naknadama za korištenje cestovnog zemljišta ("Službene novine Federacije BiH", broj: 75/10).

(4) Naknada za korištenje cestovnog zemljišta nerazvrstanih cesta, utvrđuje se ovom Odlukom i plaća se unaprijed u jednokratnom iznosu.

Stambeni i ostali poslovni objekti ne podliježu plaćanju naknade za korištenje cestovnog zemljišta nerazvrstanih cesta.

(5) Visina naknade za korištenje cestovnog zemljišta nerazvrstanih cesta od prioritetnog saobraćajnog značaja obračunava se po m<sup>2</sup> na godišnjem nivou i iznosi:

1. Za poslovne-proizvodne građevine:

a.) benzinske stanice 3,00 KM/m<sup>2</sup>;

b.) hotele, motele (ugostiteljske objekte), servise i proizvodne objekte 2,00 KM/m<sup>2</sup>.

(6) Visina naknade za korištenje cestovnog zemljišta nerazvrstanih cesta od prioritetnog značaja obračunava se po m<sup>1</sup> na godišnjem nivou i iznosi:

a.) za telekomunikacijske i elektronske kablove i slično 0,50 KM/m<sup>1</sup>.

(7) Visina naknade za korištenje cestovnog zemljišta nerazvrstanih cesta za postavljene reklame obračunava se po m<sup>2</sup> na godišnjem nivou i iznosi:

a) jednostrana reklama neosvijetljena 10,00 KM/m<sup>2</sup>,

b) jednostrana reklama osvijetljena 20,00 KM/m<sup>2</sup>,

c) dvostrana reklama neosvijetljena 15,00 KM/m<sup>2</sup>,

d) dvostrana reklama osvijetljena 30,00 KM/m<sup>2</sup>.

(8) Visina naknade za prekomjernu upotrebu nerazvrstanih cesta utvrđuje se na osnovu Elaborata o procjeni oštećenja o prekomjernoj upotrebi nerazvrstane ceste koji donosi pravno lice angažovano za održavanje i zaštitu nerazvrstanih cesta.

(9) Pored naknade iz stava 5., 6., 7. i 8. ovog člana, korisnici nerazvrstanih cesta od prioritetne saobraćajne važnosti plaćaju i troškove administrativnog postupka donošenja rješenja.

(10) Naknada troškova administrativnog postupka za donošenje rješenja iznosi:

a) naknada za davanje saglasnosti odnosno odobrenja za lokaciju i izgradnju benzinske stanice sa priključkom na nerazvrstanu cestu od prioritetnog značaja iznosi 1.000,00 KM,

b) naknada za davanje saglasnosti odnosno odobrenje za lokaciju ugostiteljskih objekata sa priključkom na nerazvrstanu cestu od prioritetnog značaja iznosi 200,00 KM,

c) naknada za davanje saglasnosti odnosno odobrenja za polaganje infrastrukturnih vodova (telekomunikacijske instalacije, elektroinstalacije) kroz trup ceste i cestovni pojas nerazvrstane ceste od prioritetnog značaja iznosi 100,00 KM,

d) naknada za davanje saglasnosti odnosno odobrenje za postavljanje reklama na cestovni pojas nerazvrstanih cesta od prioritetne saobraćajne važnosti iznosi 50,00 KM,

e) naknada za davanje saglasnosti odnosno odobrenja za izgradnju prilaza na nerazvrstanu cestu od prioritetnog saobraćajnog značaja iznosi 50,00 KM,

f) naknada za davanje odobrenja za prekomjernu upotrebu nerazvrstanu cestu od prioritetnog značaja iznosi 40,00 KM.

(11) Naknada po rješenju iz stava (5. i 6.) ovog člana obračunava se od dana donošenja rješenja do 31.12. tekuće godine, a za svaku narednu godinu korištenja cestovnog zemljišta donijet će novo rješenje u kojem je obračunski period od dana 01.01. do 31.12. tekuće godine.

(12) Naknada po rješenju iz stava 7. ovog člana obračunava se za vremenski period odobrenog korištenja cestovnog zemljišta.

#### **Član 44.**

Sredstva ostvarena od naknada za korištenje cestovnog zemljišta uplaćuju se na depozitni račun Općine Ilijaš.

### **VI – FINANSIRANJE NERAZVRSTANIH CESTA**

#### **Član 45.**

(1) Finansijska sredstva za održavanje, zaštitu, obnovu, rekonstrukciju, sanaciju i izgradnju nerazvrstanih cesta osiguravaju se:

A - Iz javnih prihoda:

1. prihoda od indirektnih poreza na ime finansiranja auto cesta i drugih cesta,
2. prihoda od indirektnih poreza koji pripadaju Direkciji cesta iz cijena nafte i naftnih derivata,
3. prihoda po osnovu naknade za korištenje državnih šuma,
4. prihoda po osnovu naknada za uređenje građevinskog zemljišta i pogodnosti zemljišta,
5. naknadama za nerazvrstane ceste koje se plaćaju za vanrednu upotrebu ceste (vanredni prijevoz),
6. naknadama za nerazvrstane ceste koje se plaćaju za prekomjernu upotrebu ceste zbog opterećenja i učestalosti vozila,
7. naknadama za korištenje cestovnog zemljišta ili od reklamnih znakova,
8. ostale naknade.

B – Kreditnim sredstvima

C – Grantova i donacija

1. iz sredstava Budžeta općina, Kantona i Federacije
2. donacijama građana i drugih subjekata.

### **VII – NADZOR**

#### **Član 46.**

Poslove nadzora nad provođenjem ove Odluke vrši nadležna Služba odnosno općinski inspektor.

#### **Član 47.**

- (1) Općinski inspektor vrši inspekcijski nadzor u skladu sa Zakonom i ovom Odlukom i to:
1. radove koji se obavljaju na cesti u zaštitnom i cestovnom pojasu nekategorisanih cesta,
  2. tehničku dokumentaciju u vezi sa radovima iz tačke 2. i 3. ovog člana (dozvole, saglasnosti, projekti, standardi),
  3. planove, programe, ugovore i ostalu dokumentaciju koja se odnosi na održavanje i zaštitu nerazvrstanih cesta,
  4. provođenje mjera za osiguranje nekategorisanih cesta i saobraćaja na njima,
  5. provođenje propisanih uvjeta za obavljanje zahvata u cestovnom i zaštitnom pojasu nekategorisanih cesta,
  6. privremenu zabranu odvijanja saobraćaja na nekategorisanim cestama ili njihovom dijelu, ako utvrdi da se na njima ne može sigurno odvijati saobraćaj, te narediti da se odmah poduzmu mjere za osiguranje saobraćaja,
  7. obustavu saobraćaja cestovnim motornim vozilima, koja zbog svojih tehničkih svojstava ili načina na koji saobraćaju mogu nanijeti štetu nekategorisanim cestama ili njenom dijelu i kada je njihov saobraćaj na cesti u suprotnosti sa Zakonom i drugim propisima,
  8. isključenje cestovnog motornog vozila iz saobraćaja na lokalnoj i nekategorisanoj

cesti kada utvrdi da dimenzije i ukupna masa ili njegovo osovinsko opterećenje prelazi veličine iz člana 56. Zakona o cestama, a prijevoznik nema odgovarajuću dozvolu za vanredni prijevoz,

9. rušenje građevine ili njenih dijelova i drugih objekata na teret investitora, kao i uspostavljanje prvobitnog stanja, ako su izgrađene ili se grade na nekategorisanoj cesti ili cestovnom pojasu bez odobrenja ili saglasnosti ili suprotno uvjetima iz odobrenja, odnosno saglasnosti nadležnog organa,
10. rušenje reklamnih znakova u cestovnom i zaštitnom pojasu postavljenih bez odobrenja ili suprotno uvjetima nadležnog organa,
11. zabranu upotrebe priključnih puteva koji su izgrađeni ili se grade suprotno odredbama Zakona o cestama,
12. u nužnim slučajevima, kada bi bila ugrožena sigurnost saobraćaja na nekategorisanoj cesti ili bi mogla nastati šteta na njoj, odrediti privremene mjere kako bi se otklonila opasnost ili spriječila šteta,
13. da se u polju preglednosti otklone nedostaci i nepravilnosti prouzrokovane kršenjem propisanih mjera za osiguranje preglednosti nekategorisane ceste,
14. poduzimanje i drugih mjera u skladu sa Zakonom i drugim propisima donesenim na osnovu Zakona.

(3) Inspektor je dužan, bez odlaganja, podnijeti zahtjev za pokretanje prekršajnog postupka, ako u vršenju nadzora, utvrdi da je počinjen prekršaj iz ove Odluke.

#### **Član 48.**

Pravna i fizička lica kod kojih se vrši inspekcijski nadzor dužna su omogućiti rad inspektoru, pružiti potrebnu pomoć i na njegovo traženje u određenom roku dostaviti podatke i dokumentaciju za vršenje inspekcijskog nadzora u smislu Zakona o cestama FBiH ("Službene novine FBiH", broj: 12/10, 16/10 i 66/13) i ove Odluke.

### **VIII – KAZNENE ODREDBE**

#### **Član 49.**

(1) Novčanom kaznom u iznosu od 200,00 do 1.000,00 KM kaznit će se za prekršaj iz ove Odluke, investitor, izvođač radova, preduzeće, općinski organ ili drugo pravno lice ako:

- a) vrši izgradnju ceste bez odobrenja za građenje,
- b) vrši izgradnju ili rekonstrukciju sa nepotpunom tehničkom dokumentacijom,
- c) ne izmjesti ili ne prilagodi instalacije nastalim promjenama u roku iz člana 17.,
- d) ne osigura trajno, neprekidno i kvalitetno održavanje i zaštitu cesta ili ne zaključi ugovor o održavanju cesta u skladu sa odredbama člana 10. ove Odluke,
- e) ne održava revizijska okna i instalacije iz člana 22. stav 7. ove Odluke,
- f) prekomjerno koristi nerazvrstanu cestu suprotno članu 25. ove Odluke,
- g) ne postavi ogradu na dijelu prostora gdje se sakuplja veći broj ljudi ili na zemljištu na kojem se redovno zadržavaju životinje, a koji se protežu uz nerazvrstanu cestu (član 27.),
- h) sadi drveće, grmlje ili visoke poljske kulture, postavlja naprave, ograde ili druge predmete koji onemogućavaju preglednost na cesti (trougao preglednosti) u blizini ukrštanja dviju cesta u nivou ili ukrštanje cesta sa željezničkom prugom u nivou ili na unutrašnjim stranama cestovnog zavoja, (član 28.),
- i) ne poštuje pojedinačno zabrane propisane članom 29. ove Odluke,
- j) ne poštuje zabrane propisane članom 39.,
- k) ne vodi evidenciju o nerazvrstanim cestama, zemljišnom pojasu, saobraćajnoj signalizaciji i opremi (član 37.),
- l) bez saglasnosti nadležnosti Službe izvrši ili odobri izgradnju instalacija ili građevina (član 40.)
- m) ne omogući vršenje inspekcijskog nadzora i ne pruži pomoć pri vršenju inspekcijskog nadzora (član 48),

(2) Za prekršaje iz stava (1) ovog člana, bit će kažnjena i odgovorna osoba investitora, izvođača radova, preduzeća, općinskog organa ili drugog organa, novčanom kaznom u iznosu od 200,00 do 500,00 KM.

#### **Član 50.**

Novčanom kaznom u iznosu od 200,00 do 300,00 KM bit će kažnjen i građanin odnosno fizičko lice, za prekršaj iz člana 49. stav 1. koji se odnosi na fizička lica ove Odluke.

### **IX – PRIJELAZNE I ZAVRŠNE ODREDBE**

#### **Član 51.**

Općinski načelnik će putem nadležne Službe pripremiti: Strategiju razvoja i održavanja javnih cesta na području Općine Ilijaš na period od 10 godina u roku od 6 mjeseci od dana usvajanja ove Odluke i dostaviti je Općinskom vijeću na usvajanje.


#### **Član 52.**

Stupanjem na snagu ove Odluke sporazumi i ugovori koji su ranije zaključeni za poslove održavanja cesta ostaju na snazi do isteka ugovorenog roka.

#### **Član 53.**

Ova Odluka stupa na snagu narednog dana od dana objavljivanja u "Službenim novinama Kantona Sarajevo".

Broj: 01/1-02-613-11/21  
Ilijaš, 30.03.2021.godine



**PREDSJEDAVAJUĆA  
OPĆINSKOG VIJEĆA ILIJAŠ**

Alma Omerović, BA nov.